

四庫全書

集部

欽定四庫全書

集部

御選歷代詩餘卷七十

詳校官中書_臣潘有為

侍讀_臣孫球覆勘

總校官進士_臣朱鈐

校對官中書_臣徐秉敬

謄錄監生_臣畢所輯

欽定四庫全書

御選歷代詩餘卷七十目錄一百字

念奴嬌 又一體

蘇軾

周紫芝 二首

趙鼎臣

呂渭老

韓駒

蔡伸

葉夢得

李邴

曾紆
二首

劉一止

趙長卿

張元幹
二首

朱敦儒
二首

曾覲

曾惇

辛棄疾

程垓

朱熹

趙彥端
二首

毛玨
三首

沈端節
二首

張炎 三首

石孝友 二首

何夢桂 二首

張翥

王世懋

絳都春 又一體

趙彥端

吳文英 三首

蔣捷

翁元龍

朱淑真

高陽臺

又一體

吳文英

二首

蔣捷

張炎

二首

李彭老

二首

李萊老

王億之

王茂孫

僧晦

張翥

前調

又一體

王沂孫

東風第一枝

高觀國 二首

史達祖 三首

張翥

趙宗霄

御選歷代詩餘卷七十目錄

欽定四庫全書

御選歷代詩餘卷七十

一百字

司經局洗馬掌局事兼翰林院修撰加二級臣王奕清奉

旨校刊

念奴嬌

又一體一名大江東去或無去字或以為大江無者誤也一名酹江月一名赤壁詞皆以蘇軾詞別名按此調若止中間平仄稍異不復另列一體因蘇詞換頭二三句上五下四故分出之

念奴嬌

赤壁懷古

蘇軾

大江東去浪淘盡千古風流人物故壘西邊人道是三
國周郎赤壁亂石穿空驚濤拍岸捲起千堆雪江山如
畫一時多少豪傑遙想公瑾當年小喬初嫁了雄姿
英發羽扇綸巾談笑間檣櫓灰飛煙滅故國神遊多情
應笑我早生華髮人生如夢一尊還酹江月

前調

秋月

周紫芝

冰輪飛上正金波翻動玉壺新綠風帽還敲清露滴凜
凜微生寒粟白玉樓高水晶簾捲十里堆瓊屋千山人

靜怒龍聲噴蘄竹
夜久斗落天高銀河還對瀉冷懸
雙瀑此地人間何處有難買明珠千斛弄影人歸錦袍
何在更誰知鴻鵠素光如練滿天空挂寒玉

前調

送路使君

周紫芝

楚山無盡看西來新擁石城雙旆立馬花邊金盞暖遙
想元戎小隊白雪歌成莫愁去後往事空千載一時吟
嘯風流不減前輩聞道夢澤南州日高初睡足雅宜
高會老去愁多誰念我空對雲山蒼翠南鴈歸時白頭

應記得尊前傾蓋送君南浦無情空恨江水

前調

送王長卿赴河間

趙鼎臣

舊遊何處記金湯形勝蓬瀛佳麗綠水芙蓉元帥與賓
僚風流濟濟萬柳亭邊雅歌堂上醉倒春風裏十年一
夢覺來煙水千里惆悵送子重游南樓依舊否朱闌
誰倚要識當時惟是有明月曾陪珠履量減杯中雪添
頭上甚矣吾衰矣酒徒相問為言憔悴如此

前調

呂渭老

暮雲收盡霽霞明
高擁一輪寒玉簾
影橫斜房戶靜小
立啼紅簌簌素鯉
頻傳蕉心微展雙
蕊明紅燭開門疑
是故人敲撼窓竹
長記那裏西樓小
寒窓靜掩風箏鳴
屋淚眼燈光情未
盡儘覺語長更促
短短霞杯溫溫羅
幘妙語書裙幅五
湖何日小舟同泛
春綠

前調

月

韓駒

海天向晚漸霞收
餘綺波澄微綠木
落天高真箇是一
雨秋容新沐喚起
嫦娥掩雲撥霧駕
此一輪玉桂華疎

淡廣寒誰伴幽獨 不見弄玉吹簫尊前空對此清光
堪掬露鬢風鬢何處問雲雨巫山六六珠斗爛煇銀河
清淺影轉西樓曲此情誰會倚風三弄橫竹

前調

蔡伸

輕雷驟雨洗千巘濃翠層巒森列衣袂涼生叢竹外時
有飛螢明滅雲浪鱗鱗蘭舟泛泛共載一輪月五湖當
日未應此段奇絕 歸路橫玉驚鷺叫雲清似水悠颺
天末玉宇瓊林凝望處依約廣寒宮闕老去情鍾此心

仍在未肯甘華髮清歡留作異時佳話重說

前調

次東坡韻

葉夢得

雲峰橫起障吳關三面真成尤物倒卷回潮目盡處秋水黏天無壁綠鬚人歸如今雖在空有千莖雪追尋如夢謾餘詩句猶傑聞道尊酒登臨孫郎終古恨長歌時發萬里雲屯瓜步晚落日旌旗明滅鼓吹風高畫船遙想一笑吞窮髮當時曾照更誰重問山月

前調

秋月次周竹坡韻

李邴

素光練淨映秋山隱隱修眉橫綠鳩鵲樓高天似水碧
瓦寒生銀粟萬丈斜暉奔雲湧霧飛過廬全屋更無塵
氣滿庭風碎梧竹誰念鶴髮仙翁當年曾共賞紫巘
飛瀑對影三人聊痛飲一洗離愁千斛斗轉參橫翩然
歸去萬里騎黃鵠滿天霜曉叫雲吹斷橫玉

前調

曾紆

片帆暮落正前邨梅蕊愁人如雪東陌西溪長記得疎
影橫斜時節六出水姿玉人微步笑裏輕輕折蘭房同

醉暗香曾共私竊 回首萬水千山一枝重見處離腸
千結料想臨鸞消瘦損時把啼紅偷浥怎得伊來許多
幽恨共撚青梢說如今千里斷腸空對明月

前調

海棠括
東坡詩

曾紆

江城春晚正海棠臨水嫣然幽獨秀色天姿真富貴何
必金盤華屋月下無人雨中有淚絕豔仍清淑豐肌得
酒嫩紅微透輕縠 曉日霧靄林深佳人春睡思朦朦
初足笑出疎籬端可厭桃李漫山麓俗燕子飛來鴻鵠

何在千里移西蜀明朝酒醒亂紅那忍輕觸

前調

和陳元載
中秋小集

劉一止

燕臺暮集對秋容淒緊松陰暮暮徙倚欄邊臨翠壑千
頃風煙橫出坐待冰輪天空雲散一色如蒼壁姮娥有
意為誰來赴今夕身世如許飄流佳時輕過了他年
空憶我輩情鍾端未媿昔日蘭亭陳迹坐上何人驪歌
淒斷語別還應惜有心紅燭替人珠淚頻滴

前調

梅

趙長卿

小春時候見早梅吐玉裁瓊妝白點點枝頭光照眼惱
損柔腸情客暗裏芳心出羣標致經歲成疎隔如今風
韻何人依舊冰雪冷艷瀟灑天然香姿肯易許遊蜂
狂蝶夜半黃昏擔帶了多少清風明月宋玉雖悲元超
雖恨見了千愁歇東君還許有情取次攀折

前調

張元幹

江天雲霧正露荷擎翠風槐搖綠試問秦樓今夜裏愁
到闌干幾曲笑撚黃花重題紅葉無奈歸期促暮雲千

里桂花初綻寒玉 有誰伴我淒涼除非分付與杯中
醺醪水本無情山又遠回首煙波雲木夢繞西園魂飛
南浦自古情難足舊游何處落霞空映孤鶩

前調

蕊香堂
賞海棠

張元幹

蕊香深處逢上已生怕花飛紅雨萬點臙脂遮翠袖誰
識黃昏凝佇燒燭呈妝傳杯凭檻莫放春歸去垂絲無
語見人却似羞妒 修禊當時今日羣賢絃管裏英姿
如許寶鬘羅衣應未有許多陽臺神女氣湧三山醉聽

五鼓休更分今古壺中天地大家著意留住

前調

朱敦儒

別離情緒奈一番好景一番悲戚燕語鶯啼人乍遠還是他鄉寒食桃李無言不堪攀折總是風流客東君也自怪人冷淡蹤跡花艷草草春工酒隨花意薄疎狂何益除却清風并皓月脈脈此情誰識料得文君重簾不卷且等閒消息不如歸去受他真箇憐惜

前調

梅次趙
仙源韻

朱敦儒

見梅驚笑問經年何處收香藏白似語如愁却問我何
苦紅塵久客觀裏栽桃仙家種杏到處成疎隔千林無
伴淡然獨傲霜雪且與管領春回孤標爭肯接雄蜂
雌蝶豈是無情知受了多少淒涼風月寄驛人遥和羹
心在忍使芳塵歇東風寂寞可人誰為攀折

前調

賦林
檣花

曾覲

羣花漸老向曉來微雨芳心初拆拂掠嬌紅香旖旎渾
欲不勝春色淡月梨花新晴繁杏裝點成標格風光都

在半開深院人寂 剛要買斷東風裊柔枝低映舞茵
歌席記得當時曾共賞玉人纖手輕摘醉裏妖嬈醒時
風韻比並堪端的誰知顚顚對花空惹思憶

前調

送淮漕
錢處和

曾惇

繡衣直指問凌風一笑翩然何許詔出層霄持漢節千
里秋風淮浦鑑遠江山竹西歌吹曾被烽煙污須君椽
筆為渠一洗塵土 休厭共倒金荷翠著重為唱渭城
朝雨看即揚鞭歸騎穩還指鬱蔥深處寶帶兼金華韞

新繡直上雲霄去回頭莫忘玉霄今夜風露

前調

次東坡韻

辛棄疾

儻來軒冕問還是今古人間何物舊日重城愁萬里風
月而今堅壁藥籠功名酒壚身世可惜蒙頭雪浩歌一
曲坐中人物三傑休歎黃菊凋零孤標應也有梅花
爭發醉裏重揩西望眼惟有孤鴻明滅萬事從教浮雲
來去枉了衝冠髮故人何在長庚應伴殘月

前調

程垓

秋風秋雨正黃昏
供斷一窓愁
絕帶減衣寬
誰念我難
忍重城離別
轉枕寒帷挑燈整被
總是相思切
知他別後負人多少風月
不是怨極愁濃
只愁重見了相思
難說料得新來魂夢裏
不管飛來蝴蝶排悶
人間寄愁天上終有歸時節
如今無奈亂雲依舊千疊

前調

梅次趙仙源韻

朱熹

臨風一笑問羣芳
誰是真香純白獨立無朋
算只有姑射山頭仙客
絕艷誰憐
真心自保邈與塵緣隔
天然殊

勝不關風露冰雪 應笑俗李麤桃無言翻引得狂蜂
輕蝶爭似黃昏閒弄影清淺一溪霜月畫角吹殘瑤臺
夢斷直下成休歇綠陰青子莫教容易披折

前調

趙彥端

雨斜風橫正詩人閒倦淮山清絕彈壓秋光江萬頃只
欠凌波羅韞好事幽人憐予止酒著意溫瓊雪翠帷低
卷怪來飛墮初月 涼夜華宇無塵舞裙香漸煖錦裯
聲闕不分金蓮隨步步誰遣芙蓉爭發賴得高情湘歌

洛賦稱作西風客為君留住不然飛去雲闕

前調 中秋

趙彥端

姮娥萬古弄清光常共山青水綠我欲蓬萊風露頂渺
視寰瀛一粟攜手羣仙廣寒遊戲玉砌琉璃屋歸來一
笑葛陂還訪騎竹 此夕縱飲清歡吸寒輝萬丈快如
飛瀑傾倒銀河斟斗杓莫問人間榮辱獨倚闌干浩歌
長嘯驚墮雲飛鵠亂呼蟾兔搗霜為駐顏玉

前調

陪張子公
登覽輝亭

毛升

層樓飛棟壓孤城臨瞰并吞空闊千古吳京佳麗地一
覽江山奇絕天際歸舟雲中煙樹鷺點汀洲雪三山無
際渺然相望溟渤 么鳳遺響悲涼故臺今不見蒼煙
蕪沒千騎重來初起廢緬想六朝人物峴首他年羊公
終在笑幾人磨滅一時尊俎且須同賦風月

前調

中秋

毛 升

素秋新霽風露洗寥廓珠宮瓊闕簾幙生寒人未定鵲
羽驚飛林樾河漢無聲微雲收盡相映寒光發三千銀

界一時無此奇絕 正是老子南樓多情辜負了十分
佳節起舞徘徊誰為我傾倒杯中明月欲攬姮娥扁舟
滄海戲濯凌波韞漏殘鐘斷坐愁人世超忽

前調

次韻施德
初席上

毛 升

麗譙春晚望東南千里湖山佳色畫戟門前清似水時
節初過燈夕封井年登京華日近每報平安驛滿城花
柳正須千騎尋覓 憶我年少追遊叨兔園客右多慚
英識今日懷人無限意老淚尊前重滴賦詠空傳雄豪

誰在鬢點吳霜白
招呼一醉幸公時
慰愁寂

前調

沈端節

湖山照影正日長
嬌困不煩勻掃絮
滿長洲春澹
池開徧吳宮花草
嫩綠蔥蔥輕紅
簌簌漸覺枝頭
少餘芳難並破
愁惟有馨醪應
是留得東君
海棠方待折
玉環嬌小霧薄
陰輕初睡足
寶幄畫屏香
裊醉態天真
半羞微歛未肯
都開了嫣然
一笑此時風
度尤好

前調

沈端節

嫩涼清曉淡秋容橫寫鮫綃十幅山水光中叅意味不
管人間榮辱藜杖屨綸巾鶴氅賓主俱遺俗倚闌舒
嘯一尊花下相屬雲際有藥千年瓊瑤爭秀發龍蛇
新劇富貴功名元自有且樂無窮真福蓮社風流醉鄉
跌宕時奏長生曲月娥同聽好風徐韻松竹

前調

周靜鏡
園池

張炎

萬塵自遠徑松存髣髴斜川深意烏石岡邊猶記得竹
裏吟安一字暗葉禽幽虛闌荷近看薄遲花氣行行且

止枯瓢枝上閒寄 不恨老却流光可憐歸未得翻恨
流水落落嶺頭雲尚在一笑生涯如此樹老梅荒山孤
人共隔浦船歸未劃然長嘯海風吹下空翠

前調

夜渡古
黃河

張炎

揚舲萬里笑當年底事中分南北須信平生無夢到却
向而今遊歷老柳官河斜陽古道風定波猶直野人驚
問泛槎何處狂客 迎面落葉蕭蕭水流沙共遠都無
行跡衰草淒迷秋更綠惟有閒鷗獨立浪挾天浮山數

雲去銀浦橫空碧扣舷歌斷海蟾飛上孤白

前調

和東坡
韻賦梅

張炎

苔痕抱石透陽春挺挺林間英物隔水笛聲那得到斜
日空明絕壁半樹籬邊一枝竹外冷艷凌蒼雪淡然相
對萬花無此清傑還念庾嶺幽情江南聊折贈行人
應發寂寂西窓閒弄影深夜寒燈明滅且看芳壺休簪
短帽照見蕭蕭髮幾時歸去朗吟湖上香月

前調

石孝友

平湖閣上正殘虹挂雨微雲擎月萬頃琉璣秋向冷忍
便翠消紅歇北海尊壘西園游宴興逸湖山發飛塵不
到坐移蓬島珠闕莫厭笑口頻開少年行樂事轉頭
飄忽公子多情真愛客敢憚深杯百罰太乙舟輕芙蓉
城鎖醉指神仙窟乘風歸去儘教吹亂華髮

前調

石孝友

平湖閣上正雌霓將捲雄風初發醉倚危欄吟眺處月
在蓬萊溟渤蓬葉香浮桂華光放翻動蛟鼉窟蹋輪誰

信宓妃曾借塵韞 人世景物堪悲等閒都換了朱顏
雲鬢遙想廣寒秋到早閒著幾多空闊太白詩魂玉川
風腋自有飛仙骨嫦娥為伴夜深同駕霜月

前調

惜春

何夢桂

三分春色更消得風雨幾番零落年少不來春老去空
負省薇階藥燕子飛忙杜鵑啼殺總為誰悲樂臨春結
綺舊家何處樓閣 一任年去年來悵畫闌舞斷塵生
簾幙回首揚州渾一夢可是風流俱錯百歲心期一春

光景付與閒杯酌青蛇猶在莫教雷雨飛却

前調

感舊

何夢桂

問春何去亂隨風飛墮楊花籬落羅韞香囊無覓處誰
有返魂仙藥細柳重門碧桃深巷回首曾行樂玉龍吟
斷夜深人在江閣因念壁月瓊枝對玉人何處繡簾
珠幙一半青銅塵滿匣空撫鸞刀金錯薇露煙銷蓮膏
花凝不寐還孤酌一春心事總將愁裏消却

前調

鴈着間

張翥

曉妝乍了又翩翩何許飛來臨鏡欲寄相思無一字拈
起芳心重省鬢禪雲低着顰山遠去翼宜相映嬌波頻
送恍如秋水涵影幾度揉損啼紅恨卿卿不到吳江
楓冷一點風流應解妒翡翠雙鈿相並慣入香奩時違
繡枕香足宮花暝多情翦就忍教分做孤另

前調

羈懷

王世懋

寒衣初授怪重鍼密線織成愁別兒女燈前誰信道野
店荒雞情節倦馬驚嘶寒雞誤唱夜半霜天月朦朧滋

味此時堪向誰說 猶記彭城渡口蚤朝滕暮兗魯山
秦碣白草黃塵青鏡裏短盡指冠危髻哀樂中年浮沉
宦况底事忙教徹濁醪擽久此時還共親切

絳都春

又一體雙
調一百字

絳都春

趙彥端

平生相遇算未有笑語閩山佳處舊日文章如今風味
渾如許眼前都是蓬萊路但莫道有人曾住異時天上

種種風流待君如故 此處君家舊物看九萬清風為
君掀舉舉上青雲却憶梅花依舊吐故人衰病今無緒
只種得梅花盈圃待君一過山家共斟露醕

前調 元夕

吳文英

融和又報乍瑞靄霽色皇都春早翠幃競飛玉勒爭馳
都門道鰲山綵結蓬萊島向晚景雙龍銜照絳綃樓上
彤芝蓋底仰瞻天表 縹緲風傳帝樂慶三殿共賞羣
仙同到迤邐御香飄滿人間閒嬉笑須臾一點星毬小

漸隱隱鳴鞘聲杳遊人月下歸來洞天未曉

前調

為郭清華
內子壽

吳文英

香深霧暖正人在錦瑟年華深院舊日漢宮分得紅蘭
遊吳苑臨池羞落梅花片弄水月初勻妝面紫煙籠處
雙鷺共跨洞簫低按歌管紅圍翠袖凍雲外似覺東
風先轉繡畔晝遲花底天寬春無限仙郎驕馬瓊林宴
待捲上珠簾教看更傳鶯入新年寶釵夢燕

前調

為李簪房
量珠賀

吳文英

情黏舞綫悵駐馬灞橋天寒人遠旋翦露痕移得春嬌
栽瓊苑流鶯長語煙中怨恨三月飛花零亂艷陽歸後
紅藏翠掩小坊幽院誰見新腔按徹背燈暗共倚寶
屏蔥蒨繡被夢輕金屋裝深沉香換梅花重洗春風面
正溪上參橫月轉並禽飛上金沙瑞香霧暖

前調

蔣捷

春愁乍畫正鶯背帶綠酴醾花謝細雨院深淡月廊斜
重簾挂歸時記約燒燈夜早圻盡秋千紅架縱然歸近

風光又是翠陰初夏
姪姪顰青泣白恨玉珮罷舞芳
塵凝榭幾擬倩人付與蘭香秋羅
吧知他墮策斜攏馬
在底處垂楊樓下無言暗擁嬌
驪鳳釵溜也

前調

秋晚海棠與
黃菊盛開

翁元龍

花嬌半面記密燭夜闌同醉深院
衣袖粉香猶未經年
如年遠玉顏不趁秋容換但換却
春游同伴夢回前度
郵亭倦客又拈箋管
慵按梁州舊曲怕離柱斷絃驚
破金鴈霜被睡濃不比花前良宵
短秋娘羞占東籬畔

待說與深閨幽怨恨他情澹陶郎舊緣較淺

前調

梅

宋媛

朱淑真

寒陰漸曉報驛使探春南枝開早粉蕊弄香芳臉凝酥
瓊枝小雪天分外精神好向白玉堂前應到化工不管
朱門閉也暗傳音耗輕渺盈盈笑靨稱嬌面愛學宮
妝新巧幾度醉吟獨倚闌干黃昏後月籠疎影橫斜照
更莫待笛聲吹老便須折取歸來膽瓶插了

高陽臺

又一體雙
調一百字

高陽臺

落梅

吳文英

宮粉彫痕仙雲墮影無人野水荒灣古石埋香金沙鎖
骨連環南樓不恨吹橫笛恨曉風千里關山歎飄零亭
上黃昏月冷欄干壽陽宮裏愁鸞鏡問誰調玉髓暗
補香瘢細雨歸鴻孤山無限春寒離魂難倩招清些夢
縞衣解珮溪邊最愁人啼鳥晴明葉底清圓

前調

壽毛
荷塘

吳文英

風裊垂楊雪消蕙草何如清潤潘郎風月襟懷揮毫倚
馬成章玄都觀裏桃千樹映麴塵十里荷塘未歸來應
戀花洲醉玉吟香東風晴晝濃如酒正十分皓月一
半春光燕子重來明朝傳夢西窓朝寒幾煖金爐燼料
洞天日月偏長杏園詩應待先題嘶馬平康

前調

送翠英

蔣捷

燕捲晴絲蜂黏落絮天教綰住閒愁閒裏清明匆匆粉
澀紅羞燈搖縹暈茸窓冷語未闌娥影分收好傷情春

也難留人也難留 芳塵滿目總悠悠問縈雲珮響還
繞誰樓別酒纔斟從前心事都休飛鴛縱有風吹轉奈
舊家苑已成秋莫思量楊柳灣西且擢吟舟

前調

張炎

接葉巢鶯平波卷絮斷橋斜日歸船能幾番遊看花又
是明年東風且伴薔薇住到薔薇春已堪憐更悽然萬
綠西泠一抹荒煙 當年燕子知何處但苔深韋曲草
暗斜川見說春愁如今也到鷗邊無心再續笙歌夢掩

重門淺醉閒眠莫開簾怕見飛花怕聽啼鴉

前調

慶承園即韓平原南園

張炎

古木迷鴉虛堂起燕歡遊轉眼驚心南園東窓酸風掃
盡芳塵鬢貂飛入平原草最可憐渾是秋陰夜沉沉不
信歸魂不到花深吹簫踏葉幽尋去任船依斷石袖
裏寒雲老桂懸香珊瑚碎擊無聲故園已是愁如許撫
殘碑却又傷今更關情秋水人家斜照西冷

前調

落梅

李彭老

飄粉杯寬盛香袖小青青半掩苔痕竹裏遮寒誰念減
盡芳雲么鳳叫晚吹晴雪料水空煙冷西冷感凋零殘
縷遺鈿迤邐成塵東園曾趁花前約記按箏籌酒戲
挽飛瓊環珮無聲草暗臺榭春深欲倩怨笛傳清譜怕
斷霞難返吟魂轉銷凝點點隨波望極江亭

前調

寄題孫
壁山房

李彭老

石筍埋雲風簟嘯晚翠微高處幽居縹緲雲籤人間一
點塵無綠深門戶啼鵲外看堆牀寶晉圖書儘蕭閒浴

研臨池滴露研朱 舊時曾寫桃花扇弄霏香秀筆春
滿西湖松菊依然柴桑自愛吾廬冰絃玉塵風流在更
秋蘭香染衣裾照窓明小字珠璣重見歐虞

前調

落梅

李萊老

門掩香殘屏搖夢冷珠鈿糝綴芳塵臨水寒花流來疑
是行雲蘚梢空挂淒涼月想鶴歸猶怨黃昏黯銷凝人
老天涯鴈影沉沉 斷腸不在聽橫笛在江皋解佩翳
玉飛瓊煙濕荒邛背春無限愁深迎風點點飄寒粉悵

秋娘滿袖啼痕更關情青子懸枝綠樹成陰

前調

王億之

雙槳敲冰低蓬護冷扁舟曉渡西泠回首吳山微茫遙
帶重城堤邊幾樹垂楊柳早嫩黃搖動春情問孤鴻何
處飛來共喚飄零輕帆初落沙洲暝漸潮痕雨漬面
色風皺旅思羈愁偏能老大行人姮娥不管征途苦甚
夜深儘照孤衾想玉樓猶凭欄干為我銷凝

前調

王茂孫

遲日烘晴輕煙縷畫鎖窓雕戶慵開人獨春閒金猊香
透蘭煤山屏煖倚珊瑚畔任翠陰移過瑤階悄無聲綵
翅翩翩何處飛來片時千里江南路被東風悞引還
近陽臺膩雨嬌雲多情恰喜徘徊無端枝上啼鳩喚便
等閒孤枕驚回惡情懷一院楊花一逕蒼苔

前調

僧晦

紅入桃腮青回柳眼韶華已破三分人不歸來空教草
怨王孫平明幾點催花雨夢半闌欹枕初聞問東君因

甚將春老却閒人
東郊十里香塵軟
旋安排玉勒整
頓雕輪趁取芳時去
尋島上紅雲朱衣引馬黃金帶
算到頭總是虛名莫閒愁一半悲秋一半傷春

前調

題趙仲穆山水便面

張翥

染黛浮空凝妝竚
遠數峯底事含顰一樣新
看從他雨抹煙勻
龍綃便面宜歌舞
看亭亭玉骨冰神幾銷魂
翠被餘香錦瑟清塵
如今歸去湖山畔
對一川平野一片閒雲
兩兩漁舟相過桂渚蘭津
誰將玉斧修明月奈

瓊樓高處無人憶
王孫芳草江南啼
鳩殘春

前調

又一體
詠紙被

王沂孫

霜楮剝皮冰花擘
繭滿腔絮濕湘簾
抱甕工夫何須待
吐吳蠶水香玉色
難裁翦更繡鍼
茸線休拈伴梅花
暗卷春風斗帳孤
眠篝熏鵲錦熊
羶一任粉融脂浣
猶怯癡寒我睡方
濃笑他欠此情緣
揉來細軟烘烘煖
儘何妨挾纈裝繇
酒魂醒半榻梨雲
記坐詩禪

東風第一枝

雙調一

百字

東風第一枝

為梅溪壽

高觀國

玉潔生英冰清孕秀一枝天地春早素盟江國芳寒舊
約漢宮夢曉溪橋獨步看灑落仙人風表似妙句何遜
揚州最惜細吟清峭香暗度照影波渺春暗寄付情
雲香愛隨青女橫陳更憐素娥窈窕調羹雅意好贊助
清時廊廟美韻高只有松筠共結歲寒難老

前調

立春日訪梅溪雨中同賦

高觀國

燒色回青冰痕綻白嬌雲先釀酥雨縱寒不壓葭塵應
時已鞭黛土東君入夜怕預惱詩邊心緒意轉新無奈
吟魂醉裏已題春句 香夢醒幾花暗吐綠睡醒幾枝
偷舞酒醅清惜同斟菜甲嫩憐細縷玉纖綵勝願歲歲
春風相遇要等得明日新晴第一待尋芳去

前調

春雪

史達祖

巧沁蘭心偷黏草甲東風欲障新暖謾疑碧瓦難留信
知暮寒較淺行天入鏡做弄出輕鬢纖軟料故園不捲重

簾悞了乍來雙燕 青未了柳回白眼紅欲斷杏開素
面舊遊憶著山陰後盟遂妨上苑熏爐重熨便放慢春
衫鍼線怕鳳鞵挑菜歸來萬一灞橋相見

前調

與高賓
王賦

史達祖

草脚春回花心夢醒鞭香拂散牛土舊歌空憶珠簾彩
筆倦題繡戶黏雞貼燕想占斷東風來處暗惹起一掬
相思亂若翠盤紅縷 今夜覓夢池秀句明日動探花
芳緒寄聲沽酒人家預約嬉遊伴侶憐他梅柳怎忍俊

天街酥雨待過了一月燈期日日醉扶歸去

前調

燈夕

史達祖

酒館歌雲燈街舞繡笑聲喧似簫鼓太平京國多歡大
醕綺羅幾處東風不動照花影一天春聚看翠光金縷
相交冉冉細吹香霧羞醉玉少年丰度懷艷雪舊家
伴侶閉門明月闌心倚窓小梅索句吟情欲斷念嬌俊
知人無據想袖寒珠絡藏香夜久帶愁歸去

前調

憶梅

張翥

老樹渾苔橫枝未葉青春肯悞芳約背陰未返冰魂陽
梢已含紅萼佳人寒怯誰驚起曉來梳掠是月斜窗外
么禽霜冷竹間幽鶴雲澹澹粉痕漸薄風細細凍香
又落叩門喜伴金尊倚闌怕聽畫角依稀夢裏記半面
淺窺珠箔甚時得重寫鸞箋去訪舊遊妝閣

前調

趙崇霄

妒雪梅颺迷煙柳醒游絲輕颺新霽捲簾看燕初歸步
屨為花早起春來猶淺便做出十分春意喜鳳釵纔卸

珠幡早換巧梳描翠
著數點催花雨膩更一陣遞香
風細小鶯歡煖調聲嫩蝶試晴舞翅清歡易失怕輕負
年芳流水好趁閒共整吟韉日日訪桃尋李

御選歷代詩餘卷七十

欽定四庫全書

御選歷代詩餘卷七十一目錄一百

字

念奴嬌 又一體

葉夢得 二首

張元幹

前調 又一體

陳允平 三首

萬年歡 又一體

晁補之 二首

前調 又一體

胡浩然

無名氏

前調 又一體

史達祖

夜合花 又一體

高觀國

史達祖 二首

周密

解語花 又一體

周邦彥 二首

方千里

吳文英

陳允平

換巢鸞鳳

史達祖

琵琶仙

姜夔

雙頭蓮

又一體

陸游

石州引

謝懋

春夏兩相期

蔣捷

龍山會

吳文英

瑞鶴仙

又一體

方岳

洪璚

樓采

前調

又一體

趙文

慶春澤

劉鎮

王沂孫

楊慎

遼佛閣

周邦彥

吳文英

陳允平

渡江雲

周邦彥

吳文英

陳允平

張炎

三首

吳澄

前調

又一體

朱敦儒

前調 又一體

劉鎮

引駕行 又一體

柳永

晁補之

錦堂春 又一體

司馬光

前調 又一體

無名氏

八節長歡

吳子孝

彩雲歸

柳永

御帶花

歐陽修

霓裳中序第一

姜夔

繡鸞鳳花犯

周密

長相思

又一體

秦觀

五福降中天

又一體

沈端節

芳草 又一體

奚倬然

四代好 又一體

程垓

舜韶新

無名氏

丹鳳吟

張翥

鳳簫吟

王之道

滿朝歡

李劉

玲瓏四犯

又一體

高觀國

梁州令疊韻

晁補之

御選歷代詩餘卷七十一目錄

欽定四庫全書

御選歷代詩餘卷七十一

一百字

司經局洗馬掌局事兼翰林院修撰加二級臣王奕清奉

旨校刊

念奴嬌

又一體雙調一百字此為平韻另分二體按此調從前皆以字句強分殊屬支離今斷以蘇軾詞及平韻者各列一格其他若湘月無俗念等名按之實無分別皆并入一格亦有減作九十八字增作一百二字者不知調名百字非如他調可以增減皆係傳謫盡去之

欽定四庫全書

御選歷代詩餘

一

念奴嬌

南歸雜用
淵明語

葉夢得

故山漸近念淵明歸意條然誰論歸去來兮秋已老松
菊三徑猶存稚子歡迎飄飄風袂依約舊衡門琴書蕭
散更欣有酒盈尊惆悵萍梗無根天涯行已徧空負
田園去矣何之窓戶小容膝聊倚南軒倦鳥知還晚雲
遙映山氣欲黃昏此中真意故應欲辨忘言

前調

葉夢得

洞庭波冷望冰輪初轉滄海沉沉萬頃孤光雲陣卷長

笛吹破層陰洶湧三江銀濤無際遙帶五湖深酒闌歌
罷至今鼉怒龍吟回首江海平生漂流容易散佳會
難尋縹緲高城風露爽獨倚危檻重臨醉倒清尊姮娥
應笑猶有向來心廣寒宮殿為予聊借瓊林

前調

代洛濱次
石林韻

張元幹

吳淞初冷記垂虹南望殘日西沉秋入青冥三萬頃蟾
影吞盡湖陰玉斧為誰冰輪如許宮闕想寒深入間奇
觀古今豪士悲吟蒼弁丹頰仙翁淮山風露底曾賦

幽尋老去專城仍好客時擁歌吹登臨坐揖龍江舉杯
相屬桂子落波心一聲猿嘯聽來虛籟山林

前調

又一體
水仙

陳允平

漠江露冷是誰將瑤瑟彈向雲中一曲清泠聲漸杳月
高人在珠宮暈額黃輕塗顫粉艷羅帶織青蔥天香吹
散珮環猶自丁東回看杜若汀洲金鈿玉鏡何日得
相逢獨立飄飄煙浪遠韞塵羞濺春紅渺渺予懷迢迢
良夜三十六陂風九疑何處斷魂飛渡千峰

前調

陳允平

疑雲泣曉正蘼花纔積荻絮初殘華表翩躚何處鶴愛
吟人在孤山凍解苔鋪水融沙甃誰凭玉勾闌茸衫氈
帽冷香吹上吟鞭 將次柳際瓊消梅邊粉瘦添做十
分寒閒踏輕澌來薦菊半潭新漲微瀾水北峰巒城陰
樓觀留向月中看巖雲深處好風飛下晴湍

前調

陳允平

霽空虹雨傍啼蜩莎草宿鷺汀洲隔岸人家砧杵急微

寒先到簾鉤步幄塵高征衫酒潤誰暖玉香篝風燈漸
暗夜長難換更籌應是鴈柱調箏鴛梭織錦付與兩
眉愁不似尊前今夜月幾度同上南樓紅葉無情黃花
有恨辜負十分秋歸心如醉夢魂飛趁東流

萬年歡

又一體雙
調一百字

萬年歡

晁補之

憶昔論心盡青雲少年燕趙豪俊二十南遊曾上會稽

千仞振袂江中往歲有騷人蘭蓀遺韻嗟管鮑當日貧
交半成翻手難信君如未遇元禮肯抽身盛時尋我
幽隱此事談何容易驥才方騁綵舫紅妝圍定笑西風
黃花斑鬢君欲問投老生涯醉鄉岐路偏近

前調

晁補之

十里環溪記當年並遊依舊風景綵舫紅妝重泛九秋
清鏡莫歎歌臺蔓草喜相逢歡情猶勝蘋洲畔橫玉驚
鷺半天雲正愁疑中秋醉魂未醒又佳辰授衣良會

堪更早歲功名豪氣尚凌汝穎能致黃金一井也莫負
鴟夷高興別有箇瀟灑田園醉鄉天地同永

前調

又一體

胡浩然

燈月交光漸輕風布暖先到南國羅綺嬌容十里絳紗
籠燭花艷驚郎醉目有多少佳人如玉春衫袂整整齊
齊內家新樣妝束歡情更闌未足謾勾牽舊恨縈亂
心曲悵望歸期應是紫姑頻卜暗想雙眉對蹙斷絃待
驚膠重續休迷戀野草閒花鳳簫人在金谷

前調

無名氏

天氣嚴凝乍寒梅數枝嶺上開折傳粉凝脂疑是素娥
妝拭先報陽和信息更雪月交光一色因追念往日歡
遊共君攜手同摘別來又經歲隔奈高樓夢斷無計
尋覓冷艷寒容啼雨恨煙愁濕似向人前淚滴怎不使
當窓思憶還只恐寂寞空枝又隨昨夜羌笛

前調

又一體

史達祖

兩袖梅風謝橋邊岸痕猶帶陰雪過了匆匆燈市草根

青發燕子春愁未醒悞幾處芳音遶絕煙溪上采綠人
歸定應愁沁花骨 非干厚情易歇奈燕臺句老難道
離別小徑吹衣曾記故里風物多少驚心舊事第一是
侵階羅襪如今但柳髮晞春夜來和露梳月

夜合花

又一體雙
調一百字

夜合花

高觀國

斑駁雲開濛鬆雨過海棠花外寒輕湖山翠暎東風正

要新晴又喚醒舊遊情記年時今日清明隔花陰淺香
隨笑語特地逢迎 人生好景難并依舊秋千巷陌花
月蓬瀛春衫抖擻餘香半染芳塵念歡約杳難憑被幾
聲啼鳥驚心一庭芳草危闌晚日無限消凝

前調

賦笛

史達祖

冷截龍腰偷拏鸞爪楚山長鎖秋雲梅花未落年年怨
入江城千嶂碧一聲清柱人間兒女簫笙共淒涼處琵琶
琶湓浦長嘯蘇門 當時低度西鄰天澹闌干欲暮曾

賦高情子期老矣不堪帶酒重聽纖手靜七星明有新
聲應更魂驚夢回人世寥寥夜月空照天津

前調

史達祖

柳鎖鶯魂花翻蝶夢自知愁染潘郎輕衫未攬猶將淚
點偷藏念前事怯流光早春窺酖雨池塘向銷凝裏梅
開半面情滿徐妝風絲一寸柔腸曾在歌邊惹恨燭
底縈香芳機瑞錦如何未織鴛鴦醉扶人月依牆是當
初誰敢踈狂把閒言語花房夜久各自思量

前調 茉莉

周密

月地無塵珠宮不夜翠籠誰煉鉛霜南州路香仙子誤
入唐昌零露滴濕微妝逗清芬蝶夢空忙梨花雲暖梅
花雪冷應妒秋芳 虛庭夜氣方涼曾記幽叢採玉素
手相將青蕤嫩萼指痕猶映瑤房風透幙月侵牀記夢
回粉艷爭香枕屏金絡釵梁絳縷都是思量

解語花

又一體雙
調一百字

解語花 上元

周邦彥

風銷絳蠟露浥紅蓮燈市光相射桂花流瓦纖雲散耿
耿素娥欲下衣裳淡雅看楚女纖腰一把簫鼓喧人影
參差滿路飄香麝因念都城放夜望千門如畫嬉笑
遊冶鈿車羅帕相逢處自有暗香隨馬年光是也惟只
見舊情衰謝清漏移飛蓋歸來從舞休歌罷

前調

周邦彥

行歌趁月喚酒延秋多買鶯鶯笑蕊枝嬌小渾無奈一

掬醉鄉懷抱，籌花鬪草，幾曾放好春閒了。芳意闌，可惜
香心一夜酸風掃。海上仙山縹緲，問玉環何事苦無
分。曉舊愁空杳，藍橋路深掩，半庭斜照。餘情暗惱，都緣
是那時年少。驚回夢，嬾說相思，畢竟如何老。

前調

上元次周
美成韻

方千里

長空淡碧，素魄凝輝，星斗寒相射。鳳樓鴛瓦，天風動，丹
丹珮環高下。歌清韻雅，對好景芳尊滿把。花霧濃，燈火
熒煌，笑語烘蘭麝。千斛明珠照夜，況人如圖畫，明艷

容冶繡巾香帔歸來路緩逐杏鶯驕馬笙歌散也愁萬
炬絳蓮分謝更漏殘驚聽西樓吹小梅初罷

前調

立春風雨錢
翁處靜江上

吳文英

簷花舊滴帳燭新啼香潤殘冬被淡煙流綺淩波步暗
阻傍牆挑薺梅痕似洗空點點年華別淚花鬢愁釵股
籠寒綵燕沾雲膩還鬪辛盤蔥翠念青絲牽恨曾試
纖指鴈回潮尾征帆去似與東風相避泥雲萬里應翦
斷紅情綠意年少時偏愛輕憐和酒香宜睡

前調

上元次周
美成韻

陳允平

鰲峰遡碧貝闕綠雲桂魄寒光射鳳檐駕瓦星河際縹
緲繡簾高下笙簫奏雅愛雪柳蛾兒笑把瓊珮搖珠翠
盈盈迤邐飄蘭麝陸地金蓮照夜富綺羅妝艷春態
容冶籠紗鞍帕香塵過禁陌寶車驕馬遊人靜也東風
裏萬紅初謝沉醉歸殘角霜天漸落梅聲罷

換巢鸞鳳

雙調一百字中
間平仄韻互用

換巢鸞鳳

史達祖

人若梅嬌正愁橫斷塢夢繞溪橋倚風融漢粉坐月怨
秦簫相思因甚到纖腰定知我今無魂可銷佳期晚漫
幾度淚痕相照人悄天眇眇花外語香時透郎懷抱
暗握萸苗乍嘗櫻顆猶恨侵階芳草天念王昌忒多情
換巢鸞鳳教偕老溫柔香醉芙蓉一帳春曉

琵琶仙

雙調一
百字

琵琶仙

吳興

姜夔

雙槳來時有人似舊曲桃根桃葉歌扇輕約飛花蛾眉
正奇絕春漸遠汀洲自綠更添了幾聲啼鴂十里揚州
三生杜牧前事休說 又還是宮燭分煙奈愁裏匆匆
換時節都把一襟芳思與空階榆莢千萬縷藏鴉細柳
為玉尊起舞迴雪想見西出陽關故人初別

雙頭蓮

又一體雙
調一百字

雙頭蓮

呈范至能待制

陸游

華鬢星星驚壯志成虛此身如寄蕭條病驥向暗裏消
盡當年豪氣夢斷故國山川隔重重煙水身萬里舊社
飄零青門俊遊誰記盡道錦里繁華歎官閒晝永柴
荆添睡清愁自醉念此際付與何人心事縱有楚柁吳
檣知何時東逝空悵望鱸羹菰香秋風又起

石州引

引或作慢雙
調一百字

石州引

謝懋

石脚斜明秋色半陰人意淒楚飛雲特地凝愁做弄晚
來微雨誰家別院舞困幾葉霜紅西風送客聞砧杵鞭
馬出都門正潮平洲渚無語匆匆短棹滿載離愁片
帆高舉京洛紅塵因念幾年羈旅淺顰輕笑風月逢迎
別來誰畫雙眉嫵回首一銷凝望歸鴻容與

春夏兩相期

雙調一
百字

春夏兩相期

蔣捷

聽深深謝家庭館東風對語雙燕似說朝來天上婺星
光現金栽花結紫泥香繡裏藤輿紅茵軟散蠟宮輝行
鱗厨品至今人羨西湖萬柳如線料月仙當此小停
颺輦付與長年教見海心波淺縈雲玉珮五侯門洗雲
華洞三春苑慢拍調鶯急鼓催鸞翠陰生院

龍山會

雙調一
百字

龍山會

載酒賞芙蓉

吳文英

石徑幽雲冷步帳深深豔錦青紅亞小橋和夢醒環珮
香煙水茫茫城下何處不秋陰問誰借東風艷冶最嬌
嬈愁侵醉霜淚紅綃灑 搖落翠莽平沙挽斜陽駐短
亭車馬曉妝羞未墮沉恨起金谷魂飛深夜驚鴈落清
歌酌花飮船快瀉去來捨月向井梧梢上挂

瑞鶴仙

又一體雙
調一百字

瑞鶴仙

壽邱提刑
除夕生日

方岳

一年寒盡也問秦沙梅放未也幽尋者誰也有何郎佳
約歲云除也南枝暖也正同雲商量雪也喜東皇一轉
洪鈞依舊春風中也香也騷情釀就書味熏成這些
情也玉堂深也莫道年華歸也是循環三百六旬六日
生意無窮已也但丁寧留取微酸調商鼎也

前調

洪璚

聽梅花吹動夜何其明星有爛相看淚如霰問而今去

也何時會面匆匆聚散便分作秋鴻社燕最傷心夜來
枕上斷雲零雨無限因念人生萬事回首悲涼都成
夢幻芳心繾綣空惆悵巫陽館況船頭一轉三千餘里
隱隱高城不見恨無情春水連天片帆如箭

前調

樓采

凍痕銷夢草又春歸舊家池沼園扉掩寒峭倩誰將花
信徧傳深窵追游趁早便裁却輕衫短帽任殘梅飛滿
溪橋和月醉眠清曉年小青絲纖手綵勝嬌鬟賦情

誰表南樓信香江雲重鴈歸少記衝香嘶馬流紅回岸
幾度綠楊殘照想暗黃依舊東風霸陵古道

前調

又一體

趙文

綠楊深似雨西湖上愁絲恨縷風流似張緒羨春風依
舊年年省嫵宮腰楚楚倚畫欄曾鬪妙舞想而今似我
零落天涯却悔相妒痛絕長堤別後楊白花飛舊腔
誰譜年光暗度往事淒涼孰訴記菩提寺路飯家橋水
何時重到夢處况柔條老去爭奈繫春不住

慶春澤

一名慶春宮
雙調一百字

慶春澤

丙子
元夕

劉鎮

燈火烘春樓臺浸月良宵一刻千金錦步承蓮彩雲簇
仗難尋蓬壺影動星毬轉映兩行寶珥瑤簪恣嬉遊玉
漏聲催未歇芳心 笙歌十里誇張地記年時行樂顚
賴而今客裏情懷伴人間笑閒吟小桃未盡劉郎老把
相思細寫瑤琴怕歸來紅紫欺風三徑成陰

前調

王沂孫

淺萼梅酸新溝水綠初晴節序暄妍獨立雕闌誰云枉
度華年朝朝準擬清明近料燕領須寄銀箋又爭知一
字相思不到吟邊雙蛾不拂青鸞冷任花陰寂寂掩
戶閒眠屢卜佳期無憑却恨金錢何人寄與天涯信趁
東風急整歸鞭縱飄零滿院楊花猶是春前

前調

上元

楊慎

魚市笙歌螳川燈火又看滇海元宵翦翦輕風綺羅十

里香飄彩雲影罩冰壺地人家在月戶星橋恣經過一
刻千金玉漏迢迢柳金梨雪催春早歎他鄉異節回
首魂消今夜相思玉人何處吹簫錦江煙水迷空望綠
琴心愁恨慵調夢回時酒醒燈昏月轉梅梢

遶佛閣

雙調一
百字

遶佛閣

旅况

周邦彥

暗塵四斂樓觀迥出高映孤館清漏將短厭聞夜久簽

聲動書幔桂華又滿閒步露草偏愛幽遠花氣清婉望
中迤邐城陰度河岸倦客最蕭索醉倚斜橋穿柳線
還似汴堤虹梁橫水面看浪颭春燈舟下如箭此行重
見歎故友難逢羈思空亂兩省愁向誰行展

前調

天街盧樓
追涼小飲

吳文英

夜空似水橫漠靜立銀浪聲杳瑤鏡匳小素娥乍起樓
心弄孤照絮雲未巧梧隕露井偏借秋早暗情多少怕
教徹膽寒光見懷抱浪跡尚為客恨滿紅塵千古道

還記暗螢穿簾街語悄歎步影歸來人鬢花老紫簫天
渺又露飲風前涼墮輕帽酒杯空數星橫曉

前調

次周美成韻

陳允平

暮煙半斂雲護淡月斜照梅館春夜偏短一牀耿耿孤
燈晃幃幔玉壺漏滿天外漸覺歸鴈聲遠離思悽婉重
懷執手東風翠蘋岸料想鳳樓人倦繡回文停綵線
顚顚淚積香銷嬌粉面歎暗老年光隙駒流箭夢中空
見漫惹起相思芳意迷亂錦衾重向紗窓展

渡江雲

亦小石調曲也取以
名詞雙調一百字

渡江雲

周邦彥

晴嵐低楚甸暖回鴈翼陣勢起平沙驟驚春在眼借問
何時委曲到山家塗香暈色盛粉飾爭作妍華千萬絲
陌頭楊柳漸漸可藏鴉堪嗟清江東注畫舸西流指
長安日下愁宴闌風翻旗尾潮濺烏紗今朝正對初弦
月傍水驛深檣蕙葭沉恨處時時自剔燈花

前調

西湖
清明

吳文英

羞紅顰淺恨晚風未落片繡點重茵舊堤分燕尾桂棹
輕鷗寶勒倚殘雲千絲怨碧漸路入仙塢迷津腸漫回
隔花時見背面楚腰身
逡巡題門惆悵隨履牽縈數
幽期難准還始覺留情轉眼帶減因春明朝事與孤煙
冷做滿湖風雨愁人山黛映澄波淡綠無痕

前調

次周美
成韻

陳允平

青青江上草片帆浪暖初泊渡頭沙翠筇便瘦倚問酒

垂楊影裏那人家東風未許漫嬾輕試鉛華飄珮環
玉波秋瑩雙鬢綠堆鴉空嗟赤闌橋畔暗約琴心傍
秋千影下夜漸分西窓愁對煙月籠紗離情暗逐春潮
去南浦恨風葦煙葭腸斷處門前一樹桃花

前調

客山陰
憶西杭

張炎

山空天入海倚樓凝望風急暮潮初一簾鳩外雨幾處
閒田隔水動春鋤新煙禁柳想如今綠到西湖猶記得
當年深隱門掩兩三株愁予荒洲古渚斷梗疎萍更

飄流何處空自覺
圍羞帶減影怯燈孤
常疑即見桃花面
甚近來翻笑無書
書縱遠如何夢也都無

前調

懷歸

張炎

江山居未定
貂裘已敝空自帶愁歸
亂水流花外訪里
尋鄰都是可憐時
橋邊燕子似軟語斜日江籬
休問我如今心事錯認鏡中誰
還思新煙驚換舊雨難招做
不成春意渾未省誰家芳草
猶夢吟詩一株古柳觀魚
港傍清池足可幽棲閒趣好
白鷗尚識天隨

前調

次趙元
文韻

張炎

錦香繚繞地深燈挂壁簾影浪花斜酒船歸去後轉首
河橋那處認紋紗重盟鏡約還記得前度秦嘉惟只有
葉題堪寄流不到天涯驚嗟十年心事幾曲闌干想
蕭娘聲價閒過了黃昏時候疎柳啼鴉浦潮夜湧平沙
白問斷鴻知落誰家書又遠空江片月蘆花

前調

送春

吳澄

名園花正好嬌紅帶白百態競春妝笑痕添酒暈豐臉

凝脂誰與試鉛霜詩朋酒伴趁此日流轉風光儘夜遊
不妨秉燭未覺是陳狂 茫茫一年一度爛漫離披似
長江去浪但要教啼鶯語燕不怨盧郎問春春道何曾
去任蜂蝶飛過東牆君看取年年潘令河陽

前調

又一體
梅花

朱敦儒

寒陰漸曉報驛使探春南枝開早粉蕊弄香芳臉凝酥
瓊枝小雪天分外精神好向白玉堂前應到化工不管
朱門閉也暗傳音耗 輕渺盈盈笑靨稱嬌面愛學宮

妝新巧幾度醉吟獨倚闌干黃昏後月籠疎影橫斜照
更莫待單于吹老使須折取歸來膽瓶插了

前調

又一體
清明

劉鎮

和風乍扇又還是去年清明重到喜見燕子巧說千般
如人道牆頭陌上春梅小是處有閒花草偶然思想
前歡醉賞牡丹時候當此三春媚景好連宵恣樂情
懷歌曲縱有珍珠難買紅顏長年少從他烏兔茫茫走
更莫待花殘鶯老恁時歡笑休把萬金換了

引駕行

又一體雙
調一百字

引駕行

柳永

虹收殘雨蟬嘶敗柳長堤暮背都門動消黯西風片帆
輕舉愁靄泛畫鷁翩翩靈囂隱隱下前浦忍回首佳人
漸遠想高城隔煙樹幾許秦樓永晝謝閣連宵奇遇
算贈笑千金酬歌百琲盡成輕負南顧念吳邦越國風
煙蕭索在何處獨自箇千山萬水指天涯去

前調

晁補之

春雲輕鎖春風乍扇園林曉埽華堂正桃李芳時誕辰
還到年少記絳蠟光搖金猊香郁寶妝了驟駿馬天街
向晚喜同車詠窈窕多少盧家壺範杜曲家聲榮耀
慶孟光齊眉馮唐白首鎮同歡笑縹緲待琅函深討芝
田高隱去偕老自別有壺中永日比人間好

錦堂春

又一體雙調一
百字或加慢字

錦堂春

司馬光

紅日遲遲虛廊轉影槐陰迤邐西斜彩筆工夫難狀晚
景煙霞蝶尚不知春去謾繞幽砌尋花奈猛風過後縱
有殘紅飛向誰家始知青春無價笑飄蓬宦路荏苒
年華今日笙歌叢裏特地咨嗟席上青衫濕透算感舊
何止琵琶怎不教易老多少離愁散在天涯

前調

又一體
雪梅

無名氏

臘雪初晴冰銷凝泮尋幽閒賞名園向長亭登眺倚徧

朱闌拂面嚴風凍薄滿堦前霜葉聲乾竟小臺深處數
葉江梅漏泄春權 百花休恨開晚奈韶華瞬息常放
教先非是東君私與和煦恩偏欲寄江南音耗念故人
隔闊雲煙一枝贈春色待把金刀翦倩人傳

八節長歡

雙調一
百字

八節長歡

吳子孝

吳國中秋愛黃金地廣白玉臺幽望東溟不遠浮雲來

往漠然收素濤
洶珠宮靜青林
暗飛上銀毬萬里澄
光如洗境曠香浮
鳴簫鬧鼓淺妝還
淡服萬人攜手
嬉遊仙客自三茅
飈輪到煙霞猶染
衣裘酣歌處神清
甚露冷風適層霄
畔樓臺燈火何似
在瀛洲

彩雲歸

雙調一
百字

彩雲歸

柳永

蘅皋向晚樣輕航
卸雲帆水驛魚鄉
當暮天霽色如晴

畫江練靜皎月飛光那堪聽遠村羌管引離人斷腸此
際浪萍風梗度歲茫茫堪傷朝歡暮散被多情賦與
淒涼別來最苦襟袖依約尚有餘香算得伊鴛被鳳枕
夜永爭不思量牽情處惟有臨歧一句難忘

御帶花

雙調一
百字

御帶花

歐陽修

青春何處風光好帝里偏愛元夕萬里繒綵構一屏峰

嶺半空金碧寶檠銀缸耀絳幕龍虎騰擲沙堤遠雕輪
繡轂爭走五王宅 雍雍熙熙作畫會樂府神姬海洞
仙客曳香搖翠稱執手行歌錦街天陌月淡寒輕漸向
曉漏聲寂寂當年少狂心未已不醉怎歸得

霓裳中序第一

霓裳本唐之道調法曲在教坊中為大樂曲凡十
二偏中分之以按拍作舞故曰中序第一宋樂志
載拂霓裳隊是也調
名取此雙調一百字

霓裳中序第一

春晚
旅寓

姜夔

園林罷組織樹樹東風翠雲滴草滿舊家行跡聽得聲
聲曉鶯如覓愁紅半濕煞顚顚牆根堪惜可念我飄零
如此一地送岑寂 龜石當年第一也似老人間風日
餘葩選甚顏色羞撚江南斷腸詞筆留春渾未得翻些
入啼鵲夜泣清江晚綠楊歸思隔岸數峰出

繡鸞鳳花犯

雙調一
百字

繡鸞鳳花犯

水仙花

周密

楚江瀟湘娥乍見無言灑清淚淡然春意空獨倚東風
芳思誰記凌波露冷秋無際香雲隨步起漫說漢宮仙
掌亭亭明月底 冰絃寫怨更多情騷人恨枉賦芳蘭
幽芷春思遠誰賞國香風味相將共歲寒伴侶小窓靜
沉煙熏翠被幽夢覺涓涓清露一枝燈影裏

長相思

又一體雙
調一百字

長相思

秦觀

鐵甕城高蒜山渡闊千雲十二層樓開尊待月掩箔披
風依然燈火揚州綺陌南頭記歌名宛轉鄉號溫柔曲
檻俯清流想花陰誰繫蘭舟念淒絕秦絃感深荆賦
相望幾許凝愁勤勤裁尺素奈雙魚難渡瓜洲曉鑑堪
羞潘鬢點吳霜漸稠幸于飛鴛鴦未老綢繆

五福降中天

又一體雙
調一百字

五福降中天

梅

沈端節

月隴煙淡霜蹊滑孤宿暮林荒驛遶樹微吟巡檐索笑
自分平生相得冰池半釋正節物驚心淚痕沾臆流水
濺濺照影古寺滿春色 沈歎今年未識暗香微動處
人初寂酷愛芳姿最憐幽韻來欸禪房深密他時悵悵
却月凌風信音難的雪底幽期爲誰還露立

芳草

又一體雙
調一百字

芳草

奚倬然

笑湖山紛紛歌舞花邊如夢如薰鄉煙驚落日長橋芳
草外客愁醒天風吹送遠向兩山喚醒癡雲猶自有迷
林去鳥不信黃昏銷凝油車歸後一着新月獨印湖
心蕊宮相荅處空巖虛谷應猿語香林正酣紅紫夢便
市朝有耳誰聽怪玉兔金烏不換只換愁人

四代好

又一體雙
調一百字

四代好

程垓

翠幙東風早蘭窓夢又被鶯聲驚覺起來空對平階弱
絮滿庭芳草厭厭未忺懷抱記柳外人家曾到凭畫闌
那更春好花好酒好人好春好尚恐闌珊花好又怕
飄零難保直饒酒好未抵意中人好相逢盡拚醉倒况
人與才情未老又豈因春去春來花愁花惱

舜韶新

雙調一
百字

舜韶新

菊花

無名氏

香滿西風催歲晚東籬黃花爭吐嫩
英細蕊金艷繁妝點高秋偏富寒地
花媒少筭自結多情煙雨妝面每年
年謝他拒霜相顧寶馬王孫休笑孤
芳陶令因誰便思歸去負春何事此
恨惟才子登高能賦千古風流在
占定泛重陽芳醕堪吟醉賞何須杏
園深處

丹鳳吟

雙調一
百字

丹鳳吟
么鳳

張翥

蓬萊花鳥記並宿苔枝雙雙嬌小海上仙姝喚起綠衣
歌笑芳叢有時遣探聽東風數聲啼曉月下人歸淒涼
夢醒悵別多歡少念故巢猶在瘴雲杪甚閉入雕籠
庭院深悄信斷羈雌遠鎮怨情縈繞翠衿近來漸短看
梅花又還開了縱解收香寄與索羅浮春杳

鳳簫吟

雙調一百字
亦名芳草

鳳簫吟

九日

王之道

雨溟濛年年今日農夫共卜時豐登高隨處好銀屏突
兀南峙對三公真珠溥露菊更芙蓉照水勻紅但華髮
衰顏不堪頻鑑青銅相逢行藏休借問且徘徊目送
飛鴻十年湖海千里雲山幾番殘照淒風蟹螯虀廬似臂
金英碎琥珀香濃細讀離騷為君一飲千鍾

滿朝歡

雙調一
百字

滿朝歡

壽韓尚
書出守

李劉

一點箕星近天邊
光彩輝耀南極竹
馬兒童盡道使君
生日元是鳳池仙
客曾曳履持荷簪
筆稱觴處晚節花
香月周猶待五夕
誰道久拘禁掖任
雙旌五馬暫從
遊逸九棘三槐都
是等閒親植見說
玉皇側席但早晚
促歸調燮功成了
笑傲南山壽如南
山松栢

玲瓏四犯

又一體雙
調一百字

玲瓏四犯

高觀國

水外輕陰做弄得飛雲吹斷晴絮駐馬橋西還繫舊時
芳樹不見翠陌尋春問著小桃無語恨燕鶯不識閒情
却隔亂紅飛去少年曾失春風意到如今怨恨難訴
魂驚冉冉江南遠煙草愁如許此意待寫翠牋奈斷腸
都無新句問甚時舞鳳歌鸞花裏再看仙侶


梁州令疊韻

一百字分四疊故謂之疊韻向以第二疊與第一
疊同則第四疊應與第二疊同疑有脫誤然按舊
本皆然當不拘也

梁州令疊韻

晁補之

田野閒來慣睡起初驚曉燕樵青走挂小簾鉤南園昨夜細雨紅芳徧平蕪一帶煙花淺過盡南歸鴈俱遠凭闌送目空腸斷好景難常占過眼韶華如箭莫教鷓鴣送韶華多情楊柳為把長條絆清尊滿酌誰為伴花下提壺勸何妨醉卧花底愁容不上春風面



御選歷代詩餘卷七十一